

# Powšitkowne WOZJEWJENJA

njedźelu, 23. septembra 2012

## Nyšpor z požohnowanjom konjacych zapřahow

Towarstwo Cyrila a Metoda z.t., sekcija wěda a skutk, přeprošuje tež lětsa wěriwych ze wšitkich serbskich wosadow na wosebity nyšpor domchowanki. Tutón budže njedźelu, 30. septembra, w 14 hodź. w Chróścicach na łuce při Hatkach (za starownju). Na nyšporje požohnuja so konjace zapřahi. Wotrowski cyrkwinski chór a Chróścanska pěstowarnja jón wobrubitej. Po nyšporje přewjedu so čaporowe wiki. Wunošk wužije so za rjedženje pišćelow Chróścanskeje cyrkwy.

## Dopomnić so na přichod

Składnostnje 50lětneje róčnicy zahajenja Druheho Watikanskeho koncila přewjedže so w Smochčanskim Domje biskopa Bena wot pjatka do njedźele, 5. do 7. oktobra, schadźowanje pod temu „Dopomnić so na přichod“. Zarjadowarjo stej nimo tamnišeho zarjadnišća Drježdžansko-Mišnjanske biskopstwo a Katolska akademija. Hłowny referent budže profesor dr. Ralf Miggelbrink z Essena. Zajimcy měli so w Domje biskopa Bena přizjewić, telefonowe čisło (03 59 35) 220. Woni móža so tež jenož na jednotliwych přednoškach wobdźělić.

## Kubłanski dzeń za 3. a 4. lětnik

Sobotu, 6. oktobra, wot 9 do 15 hodź. su džěci 3. a 4. lětnika na zhromadny dzeń do Don Boskowneho domu we Worklecach přeprošene. Zajimcy njech so prošu hač do pjatka, 28. septembra, pod telefonowym čislom (03 57 96) 8 87 07 we Worklecach přizjewja. Za wudawki dnja zběra so wot kóždého wobdźělnika přinošk, kotryž wučinja tři eura.

## Jězba do Rudnych hór za 5. a 6. lětnik

Na jězbu do Rudnych hór přeprošuje Dekanatne dušepastyrstwo džěci 5. a 6. lětnika wot pónđzele do štwórtka, 22. do 25. oktobra. Za jězbu zběra so wot kóždého wobdźělnika přinošk we wysokosci 60 eurow. Zajimcy njech so prošu hač do pjatka, 5. oktobra, pod telefonowym čislom (03 57 96) 8 87 07 přizjewja.

## Zetkanje samostejacych

Samostejacy ze serbskich wosadow kaž tež dalši zajimcy su sobotu, 20. oktobra, w 14 hodź. do Domu biskopa Bena w Smochčicach přeprošeni. Zajimcy njech so hač do štwórtka, 11. oktobra, w redakciji Katolskeho Posoła přizjewja, telefonowe čisło (0 35 91) 55 02 12. Štóž chce wotewzaty być, njech to prošu zdžěli.

## Joachim Jauer přednošuje znowa we Łužicy

Wo podžělu křesćanow na zwrěšćenju komunizma budže něhdyši korespondent ZDF w NDR a wuchodnych krajach Joachim Jauer pjatk, 12. oktobra, we Wojerecach přednošować. Zarjadowanje na katolskej farje, Karl-Liebnechtowa 17, zahaji so w 20 hodź. K samsnej temje přednošowaše Joachim Jauer runje před lětom w Chróścicach na farje.

## Wšědne hesła wušli

Ochranowske hesła, knižka za wšědnu pobožnosć, předleža tež za lěto 2013 w serbskej rěči. Wone su w zhromadnym džěle ze Serbskim ewangelskim towarstwom w Ludowym nakładnistwje Domowina wušli.

## Serbskorěčne eksercicije

Maće hišće jedyn dzeń dowola? Mam namjet, kak móžeće jón wužić za wočerstwjenje a připódla so nasrěbać duchownych mocow. W Drježdźanskim eksercicijnym domje Wysoke duby wotměja so wot štwórtka, 11. oktobra, wječora hač do njedzele, 14. oktobra, připołdnja eksercicije za serbskich wěriwych. Jezuitski pater Petrus Köst kurs přewjedže. Modlitwy a kěrlušy su serbske, přednoški něm-ske. Nimo toho su tam přijomne stwy, dobra kuchnja a krasna wokolina za wuchodžowanje. Zajimcy njeh so telefonisce přizjewja pod čisłom (03 59 35) 2 04 25. T. Kubašec

## Premjera hry „Hdyž rentnarjo zapřimnu“

Chróšćanska serbska lajska dźiwadłowa skupina přeprošuje na předstajenje kriminalneje komedije „Hdyž rentnarjo zapřimnu“. Premjera budže pjatk, 28. septembra, w 20 hodź. pola Krawčikec w Chróšćicach. Hra so sobotu, 29. septembra, w 19.00 hodź. na samsnym městnje wospjet předstaji.

## Wulět njebudže

Wulět dekanatneje serbskeje młodžiny, kotryž bě za njedzelu, 30. septembra, planowany, dyrby z tutym bohužel wotprajić. Nimamy tuchwilu referenta respektiwne referentku w młodžinskim dušepastyrstwje. Tohodla ani běrow dekanatneje młodžiny wobsadženy njeje. Tež trěbne planowanja, zřěčenja a wotličenja njehodža so tuchwilu zwoprawdźić. Prašenja nastupajo nadregionalne młodžinske džělo prošu direktnje wosadnym duchownym abo biskopskemu dušepastyrstwu młodžiny w Drježdžanach dowěrić. Farar Měrcin Deleńk

## Wustajeńca wo Žitawskich póstnych rubach w Hejnicach

Přichodna stacija pućowanskeje wustajeńcy po Europje k Žitawskim póstnym rubam je w čěskich Hejnicach. Hač do njedzele, 4. nowembra, móža sej zajimcy pokazku pod temu „Zetkanja, kotrež hnuja“ w Mjezynarodnym centrumje za duchowne wobnowjenje wobhladać. Na 14 taflach su atraktywne fota a teksty wo Žitawskich póstnych rubach a kulturnej čarje VIA SACRA widžeć. Kopija małego póstneho ruba pokaza so w tym času w putniskej cyrkwi Marije wopytanja hnydom pódlu kubłanskeho centruma.